

La finamira resta

Nagina Chasa dals chors sin l'Arcas

DA GION NUTEGN STGIER/FMR

■ **Er sch'il project na vegn betg realisà sco quintà ils dus davos onns, l'idea da realisar a Cuira ina Chasa dals chors resta. Ils iniziants han adina la speranza da chattar in bajetg che savess in di porscher tetg a la cultura da chant.** La citad da Cuira, quella è en possess da plis edifizis, per part objects ch'han il basegn d'ina sanaziun. Ultra da quai duessan quels bajetgs na star vids, mabain saja da transponer quels en ina necessitad, ha ditg *Urs Marti*, il president da la citad da Cuira. Tar in da quels objects tutga er la Chasa Arcas en la part veglia da la citad. Il parlament da Cuira ha deliberà per la sanaziun da quel bajetg 2,5 milliuns francs. Marti ha punctuà che l'intent da la sanaziun saja adina stà da chattar organizaziuns culturalas che fetschian diever da la Chasa Arcas. L'interess saja stà avant maun e sunter las examinaziuns da la concorrenza da projects sajan a la fin finala restads trais: Il project Chasa dals chors «Haus der Chöre», il teater da giuvenils «Zapperlot» ed il «Forum Arcas Cuira». Decidi è lura vegni da persequitar vinavant quel dals chors, inizià da l'organizaziun «Singstadt Chur» e quel dal teater da giuvenils.

Memia pauc spazi

Christian Klucker, in dals iniziants da la Chasa dals chors, ha ditg che a Cuira sajan bunamain 30 furmazions da chant activas. Cun quel project avess Cuira gi in bajetg che fiss stà a disposiziun a chors per provas, per s'entupar, per bars, per scolaziun, per sedutas e per seminaris. La Chasa dals chors avess er gi d'avair in effect positiv sin il turissem cun chors, dirigents e cumponists far diever da quel center da cumpetenzza per chant ed er musica. La raschun che la Chasa dals chors na vegn betg realisada en la Chasa Arcas è che cun pudair metter a disposiziun als chors be dus locals sajan spazi e capacitad memia pitschens, ha ditg Klucker. Marti, el ha ditg che pervia da las directivas da la polizia da fiue e da l'assicuranza d'edifizis che pre-



Ils trais iniziants principals da la Chasa dals chors: Heinz Girschweiler, Gian-Reto Trepp e Christian Klucker (da san.).

FOTO GION NUTEGN STGIER



L'antierura Biblioteca populara sin l'Arcas – anc adina en tshertga da projects.

FOTO RTR

tendan avunda sortidas d'urgenza giaja a perder bler spazi cun sanar la Chasa Arcas.

Economicamain betg supportabel

Gian-Reto Trepp, er el in dals iniziants principals da la visiun Chasa dals chors, ha ditg che cun mancar en la Chasa Arcas avunda localitads per chors, chantadurs, chantaduras, dirigents e dirigentas na fiss la Chasa dals chors economicamain betg supportabla. Il potenzial da duvrar quella fiss segir stà avant maun, haja la Svizra tuttina 1500 chors cun var 40 000 chantadurs e chantaduras. Klucker, el ha ditg: «Il project vegn persequità vinavant cun la clera finamira da realisar la Chasa dals chors.» En ina mo-

da u l'autra saja segir da chattar ina soluziun per tuttina avair in di in «cutier» per l'entira famiglia dals chors.

A pled è er vegni il dirigent e musicist *Heinz Girschweiler*. Er el appartegna tar in dals iniziants da la Chasa dals chors. Segir saja donn che quel project saja per il mument anc en las stailas. Almain possia Cuira retschaiver il schaner 2021 chantadurs e chantaduras per in «workshop» da chant naziunal. A la fin d'october 2021 daventa la chapitala grischuna in lieu d'entupada per 40 chors svizzers cun passa 1000 chantadurs e chantaduras cun la ConcurrENZA da chors svizra. Cun aulas, salas e baselgias saja avunda capacitad avant maun, ha menziunà Klucker.